

1310 ferarum ponte ad Principis conspectum retracti, confestim securi subjecti sunt: ferunt jam inde *Mali vadi* nomen loco mansisse. Ad abolendam nefandorum capitum memoriam publico est decreto edictum: ut Bajamontis & omnium, qui cum eo conjurassent, signa undique tollerentur, futurumque capitale huic, qui ea in albo aut alio loco postea retulisset: ædes dirutæ, cætera bona publicata. Quidam Bajamontis ædes ibi fuisse memorant, ubi nunc macellum in Rivoalto est. Ex arario stipendium mulieri, quæ Bajamontem subito ictu retardaverat, ac posteris decretum. Festa Viti Martyris lucē ajunt nefandam conjurationem oppressam: quo fit, ut quotannis statto die Dux cum bona parte Patrum, præeunte clero, quasi publicam salutem Divo gratulaturi, ejus ædem invisunt: unde reversi laute in curia epulantur. Scio ego non deesse, qui exitum conjurationis hujus diversum ab hoc quem dixi, memorent: tradantque Principem aliquanto antea, quam ad arma sit ventum, de conjuratione rescivisse: missosque publico nomine Marcum Michaelem & Guidonem Canalem ad Bajamontis ædes, qui eum orarent, ne quid in patriam temere moveret: ac certe parum abfuisse, quin legati a conjuratis fuerint violati. Inde sumptis armis, publicis quibusdam locis incendio & rapina fœdatis, in aperto, ut diximus, esse dimicatum: demum nefandis armis cum cade repulsis, optimatum factionem vicisse. Inde Ugolini Justiniani interventu, qui cum magna hominum manu in auxilium Patrum venerat (erat tum ille Clodiæ Prætor) Bajamontem & socios, qui ultra Riumaltum se tenebant, metu territos, in Principis & Patrum fidem ea conditione venisse, ut conjurationis conscii extra Venetos fines exularent; atque ita accidisse, ut nulla fere urbs sit in tota Cisalpina Gallia, nullum oppidum in littorali Flaminia & Carnorum ora, in quod conjuratorum aliquis exulatum non abiverit. Sed celebrior fama id habet, quod prius memoravimus. Hac temporum novitate Jaderenses freti, Michaelē Mauroceno Comite ejecto, sexto rebellarunt.

Ad